

2.1. Unutarnja organizacija i nadležnosti

Centar za javne politike Evropske Unije Univerziteta u Sarajevu trebao bi postati stabilan mehanizam i inicijator procesa koji će osigurati kontinuitet u izvršavanju obaveza u procesu pridruživanja Evropskoj Uniji. Očekuje se da će ovaj *Centar* postati relevantna “adresa” za sva pitanja iz procesa evropskih integracija.

Centar za javne politike Evropske Unije Univerziteta u Sarajevu razvijat će se sistemskom izgradnjom vlastitih kapaciteta koristeći iskustva domaćih stručnjaka sa Fakulteta političkih nauka, ali i ostalih fakulteta Univerziteta u Sarajevu s obzirom na utvrđene politike interesiranja, te uz asistenciju stranih eksperata čija podrška je osigurana kroz navedeni DEPOCEI TEMPUS projekat.

Organizacijsku strukturu Centra čini:

- Voditelj Centra, i
- Odbor Centra.

Za Voditelja Centra može biti izabran kandidat/kandidatkinja koji ispunjava opće i posebne uvjete utvrđene Statutom i Pravilnikom o unutarnjoj organizaciji. Pored izbora u naučno-nastavno, odnosno umjetničko-nastavno zvanje redovnog profesora, vanrednog profesora ili docenta na Univerzitetu, Voditelj Centra treba da posjeduje naučne/stručne reference u oblasti problematike evropskih integracija. Voditelj Centra, pored motivacije, uz prijavu mora dostaviti i **Program rada i razvoja Centra za javne politike Evropske Unije Univerziteta u Sarajevu**.

Centar za javne politike Evropske Unije Univerziteta u Sarajevu struktuiran je po resorima koji odgovaraju evropskim politikama u pojedinim oblastima. Resori se uspostavljaju odlukom Voditelja Centra, a na osnovu odluka Upravnog odbora projekta. Na čelu svakog resora nalazi se Voditelj resora kojeg imenuje Rektor na prijedlog Voditelja Centra. Voditelji resora članovi su Odbora Centra po sili svoje funkcije. Odbor Centra ima zadatak koordiniranja aktivnosti među resorima, razmatra aktuelnu problematiku u pogledu aktivnosti Centra, te predlaže Voditelju Centra konkretne mjere za unapređenje funkcioniranja Centra.

Održivost *Centra za javne politike Evropske Unije Univerziteta u Sarajevu nakon završetka Tempus DEPOCEI projekta* ogleda u angažiranju postojećeg akademskog osoblja na zadacima Voditelja Centra i voditelja pojedinih resora.

Centar za javne politike Evropske Unije pruža usluge edukativnog karaktera kroz organiziranje trening-seminara u pogledu problematike evropskih integracija. Također, ne treba posebno napominjati da su svi nivoi vlasti u BiH u obavezi donijeti veliki broj potpuno novih zakona kompatibilnih sa *acquis communautaire* (prema nekim procjenama preko 1 400) gdje bi stručna podrška *Centra za javne politike Evropske Unije* bila neophodna sa stanovišta pravilnog i pravovremenog usklađivanja domaćeg zakonodavstva sa evropskim pravnim naslijeđem. Tome treba dodati i potrebu usklađivanja postojećeg zakonodavstva u tom pravcu. Na koncu, valja naglasiti da je *acquis communautaire* "entitet u razvoju", kao i sama Evropska unija, te da će potreba praćenja trendova ovog razvoja još dugo biti prisutna, kako na ovim prostorima, tako i u zemljama koje već imaju status država-članica.

Nadležnost *Centra za javne politike Evropske Unije*:

- podizanje društvene svijesti o značaju procesa evropskih integracija i njegovom mogućem uticaju na svakodnevni život građana kroz razne vidove edukacija i javnog agitovanja;
- javno djelovanje i provođenje aktivnosti istraživačkog i edukativnog karaktera koje dovode do podizanja nivoa odgovornosti nosilaca vlasti na svim razinama njene organizacije;
- provođenje aktivnosti edukativno-istraživačke prirode usmjerenim prema subjektima političkog života sa ciljem kreiranja svojevrsne institucionalne "memorije" koja bi vodila etabliranju širokog političkog konsenzusa o neophodnosti izvršavanje obaveza iz procesa pridruživanja Evropskoj uniji u kontinuitetu, te na način koji maksimalno uvažava stručni pristup;
- kontinuirano praćenje evropske legislative u pojedinim oblastima evropskih politika;
- analiza domaćeg zakonodavstva sa aspekta evropskih standarda;
- identificiranje neusklađenosti sa *acquis communautaire* u oblastima reforme značajnim za proces evropskih integracija;
- analiza prakse evropskih supranacionalnih institucija i institucija država članica u provođenju *acquis communautaire*;

- izrada teorijskih modela, primjenjivih u praksi domaćih institucija, koji se tiču usvajanja "dobre" evropske prakse u njihovom redovnom funkcioniranju;
- izrada teorijskih modela, primjenjivih u praksi, konsekventne implementacije evropskih standarda u pravni sistem BiH;
- davanje preporuka domaćim institucijama za otklanjanje uočenih neusklađenosti, te
- edukacija/trening sudionika procesa političkog odlučivanja i političkog života uopće u pogledu suštine reformskih procesa na putu pridruživanja Evropskoj uniji u pojedinim/konkretnim oblastima javnih politika.